

## Ove Jude Mi Gaisira

<sup>1</sup> Na Jude mi ove eiawa jivena. Na awa Iesu Keriso da buro embo edo na awa James da namendi.

Ingo embo God mi jawo sisira ainda yei na ove eiawa jivena. Edo ingo God da dubo bari kumbudo edo atari ewamei atewa edo Iesu Keriso mi ingo simba ira.

<sup>2</sup> Jo ari de jo jamo jamo de dubo bari de ingoda jo da raware.

### *ATOPAPOTEGARI PASEGA EMBOBO DA GE*

<sup>3</sup> Naso otatao ewagaewa na ingoda yei ingodenaso soregari da ge awawa jiwari dipapa ena te atopapotegari pasega embobo awa kotise gido na kotetena ungodawo da ge ingoda yei gaiadena. Edo embo eiawa mi edo gido tumonda ari da ge God mi uso embobo da yei ititisira awa jumboro wosarase jarera awasedo na ove eiawa ingoda yei edo sano ingo embobo ainda dombu da derido dagaia edo ungodawo yei Keriso da jawo da binga awa gebe ra awa goroba de sawo gorase sena. <sup>4</sup> Edo embo eiawa awa gae teda torido ingodenaso embo nenei da teda atera. Edo ungo embo awa God gaera. Edo ungo God da ewamei ari ge awa ingido edo ungo ge awa budo wareregeoro ge nei edo ira. Edo ungo mi sedo era wasiri bebegae adera amone awara ainda be awa God awa embo da yei ewamei edo ira awasedo. Edo ungodawo ge awa biae ra. Edo ungo Iesu Keriso ingodenaso Bada de bajari de awa ujo ae edo era. Edo matu be matu jiwari da sisera riroga embobo amimi kumbadera awawa sisera.

<sup>5</sup> Edo ingo ingoda mamoo umbogo da kiki ingisewa awarate gaegae edo ruvegeowase sedo na ingoda yei sekago sari dipapa ena. Edo Israel embobo awa Egypt busu

da memesi burise atero God mi ungo sosegurisira awarate amboda God embo uso ge dodo isera awa usibesi isira. <sup>6</sup> Edo asisi ewamei nenei da buro God mi orase itido isira awa dodo ungo wasiri bebegae eiawa edo isera. Edo God mi ungo awa yei umenga matawa atari da tuda ititisira edo unemi ungo bundisira. Edo ungo bundetiri ungo God da kasari iji awawa bugarase simba era. Edo iji awa bugari God mi ungo kasadira. <sup>7</sup> Edo nati Sodom de Gomorra de edo nati nenei demonda da awodo isera ainda ro isiri awa ruvegeove. Nati ainda embobo awa wasiri bebegae edo isera. Edo ungo embo nenei da aro asini da ambo da yima edo isera. Edo embo ungodada aro dodo ungosuka wasiri sino da awa edo isera. Awasedo ungo ungodada wasiri bebegae da riroga awa kumbudo edo riawo matawa atari da totorisera. Edo ungodada yei ro isiri awa gido embo berari oju ore.

<sup>8</sup> Da awodo atopapotegari pasega embobo eiawa wasiri bebegae ari awa doae era. Edo ungodada atopatari awa teta embo da kotari eturo da awodo ra. Edo ungo God da bajari awa ujo ae edo ungo utu da gitijijigegari da jawo da ge bebegae sera. <sup>9</sup> Awarate Michael asisi ewagaewa da gitijigari embo awodo aera. Michael Satan ga da Moses da tamo da ge bagisera edo iji ainde umo isibari ge mi ge bebegae Satan da yei saera awarate umo sisira God mi imo bekuba edo imo kasare sisira. <sup>10</sup> Awarate atopapotegari pasega embobo eiawa rora ungo gae ainda jawo da ge bebegae sedo era. Edo rora ungo gosera rora awa ungo teta ambe wo da kotari da awodo kotise gido era awarate rovi ravi re amimi ungo usibesi adira.

<sup>11</sup> Edo ungo ungodada kasari kumbadera iji awa bugadira. Edo ungo awa Cain da emboro biae awa ambo ambo era. Edo gano kumbadi sedo ungo wasiri biae teta Balaam mi wasiri biae isira da awodo awa adera. Edo ungo God da yei

beuso era teta Korah mi God beuso isira da awodo edo era. Edo ungo teta Korah atae isira da awodo atae adera.

<sup>12</sup> Edo embobo awa ingoda bondo da bugudo men ae wasiri bebegae adera. Edo ungo awa teta embo dongono de embo ewamei da teda inge ra. Edo ungo iji berari indari ungo awa embo kumbadi kotedo era te ungo embo nenei awa kotae edo era. Edo ungo awa teta poroga ga ae bisara mi piguri tepo sumbudo era da awodo ra. Edo ungo awa teta ri ribe ari iji de be ae edo ira da awodo ra. Edo ungo awa teta ri embo mi sokubeoro ambudo ira da awodo ra. <sup>13</sup> Edo ungodan wasiri bebegae awa teta poro bebegae yawata ise piguri kora da vitido ira da awodo ra. Edo ungo awa teta damana mambudo bugudo ise utu da atima ira da awodo ra. Edo God mi yei umenga be umenga da ungo awa embo sia etiri atira.

<sup>14</sup> Adam da orobe bugusera. Edo orobe 6 awodo atae etiri Enoch bugusira. Edo umo God da binga sari embo edo embobo einda jawo da ge sedo sisira, “Giwo Keriso uso asisi ewamei jiwae be jiwae de bugadira. <sup>15</sup> Edo umo bugudo embo berari kasadira. Edo unemi wasiri bebegae berari wasiri bebegae ari embobo God gae mi era awa isaga adira. Edo ungo God oju ae wasiri bebegae era edo God da jawo da ge bebegae sera. Edo unemi ungodan wasiri bebegae berari awa God da dombu da isaga ari ungo ge atae adera.

<sup>16</sup> Edo embobo eiawa iji berari mendo detegurise edo ungo iji berari embo nenei bekuba edo era. Edo ungo ungodan dipapa bebegae awa ambo ambo ise atima era. Edo ungo ro era awa jariga ge sedo era. Edo ungo rora ro dipapa era awa kumbadi sedo embo nenei da yei jo bari ge sedo era.

*DENGORO ARI GE AWA*

<sup>17</sup> Awarate naso otatao ingodenaso Bada Iesu Keriso da atopapotegari embobo mi ingoda yei ro sisera awa ruvegeove. <sup>18</sup> Edo ungo ingoda yei sisera iji sangove da iji awa bugari embo ingo gandubadera awa bugadera edo embobo awa God oju ae ungodada dipapa bebegae awa ambo ambo adera sisera.

<sup>19</sup> Edo embobo amimi oro embo kausu kausu edo dombu dombu adera. Edo God da Asisi awa ungodada jo da gitijigae ra awarate ungodada dipapa bebegae mi ungodada jo da gitijijigurira. <sup>20</sup> Awarate naso otatao ingoda goroba awa iji berari babojise atarase sedo awa Keriso tumonda ise atiwo. Edo ingoda tumonda ari awa ingoda goroba da tutuvi ra. Edo Asisi Kotopu da uso goroba mi ingo kondade irirari iji berari God manunugewo. <sup>21</sup> Edo ingo Iesu Keriso mi ingoda yei wasiri matawa atari itarase simba ise gido iji berari God da dubo bari da atiwo. Edo Keriso awa ingo jo edo ira edo God da dubo bari mi ingo jiroroka edo ira.

<sup>22</sup> Edo embo utu da ge da jiro buro ae edo era ainda yei jo ewo. <sup>23</sup> Edo nenei awa soregewo teta ingo mi embo riawo da be da soumbarago ewo. Edo embo nenei da yei edo gogo ise kondade ewo awarate gaegae edo ungo mi oro ingo wasiri biae ungo mi edo era da awodo eove ta gido gogo be ewo. Edo ungo jo adewa te ungodada wasiri bebegae awa ujo ae ewo.

### **GOD JASIGA EWO**

<sup>24</sup> Gaegae edo ingo kokosa da durowase God mi ingo kondade adira. Edo God mi ingo wasiri biae ae budo uso jo da bugadira. Edo umu ingo budo uso jo da bugadira awa ingo iaviri be adewa. <sup>25</sup> Edo ingodena Iesu Keriso ingodenaso Bada da yei awodo ingode God ingodenaso soregari embo jasiga ore. Edo God usasa de gitijigari da giro sagiro de edo goroba de boroko atira. Edo umu matu awodo atisira edo matawodo atadira.

JUDE 25

5

JUDE 25

Awara  
Iso namendi  
Iesu Keriso da jawo da  
Jude

BINGA EWAMEI IESU KERISO DA JAWO DA  
The New Testament in the Ewage-Notu Language of Papua New  
Guinea

Nupela Testamen long tokples Ewage-Notu long Niugini

copyright © 1987 Wycliffe Bible Translators, Inc.

Language: Ewage-Notu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

---

PDF generated using Haiola and XeLaTeX on 19 Jul 2019 from source files dated 19 Jul 2019

901ecdaa-e20b-5e4f-a560-92b077a0eea3